

12 JUL 2003

Multaqa-Sekretariat

M'SIA SEDIA DANA BIAYAI SEKRETARIAT TETAP MULTAQQA ULAMA SEDUNIA

PUTRAJAYA, 12 Julai (Bernama) -- Malaysia akan menyediakan dana bagi membiayai aktiviti Sekretariat Tetap Multaqa Ulama Sedunia yang penubuhannya disokong para ulama, cendekiawan dan pemikir Islam yang menghadiri persidangan itu di sini.

Pengerusi Jawatankuasa Induk Multaqa Ulama Sedunia Tan Sri Dr Abdul Hamid Othman berkata sekretariat itu juga sedia menerima sumbangan daripada organisasi atau pihak lain.

Katanya anggota sekretariat itu akan terdiri daripada ulama dari dalam dan luar negara dan struktur organisasinya akan ditentukan selepas mendapat pandangan Datuk Seri Dr Mahathir Mohamad.

"Sekretariat tetap itu akan beribu pejabat di Kuala Lumpur," kata Dr Abdul Hamid yang juga Penasihat Agama kepada Perdana Menteri kepada pemberita di luar multaqa yang masuk hari ketiga dan terakhir hari ini.

Cadangan pembentukan sekretariat tetap yang bertujuan mengupas dan merancang tindakan seperti penganjuran seminar, bengkel dan perbincangan berkaitan isu yang membabitkan umat Islam itu diilhamkan oleh Dr Mahathir sendiri.

Dr Abdul Hamid berkata ulama yang menghadiri multaqa itu, termasuk dari Eropah dan Amerika Syarikat yang berpengalaman luas, telah menyatakan kesediaan mereka untuk membantu sekretariat tetap tersebut.

Mengenai kemungkinan pejabat Pertubuhan Persidangan Islam (OIC) dipindahkan (dari Jeddah) ke negara lain kerana badan itu sering dikritik dan dianggap kurang berkesan dalam menjayakan peranannya, beliau berkata organisasi yang mewakili umat Islam perlu melaksanakan objektif asalnya.

Beliau berkata struktur sesuatu organisasi itu perlu disusun semula sekiranya didapati kurang berkesan supaya cara berfungsi dan bertindak dapat dilakukan dengan lebih efektif.

Ditanya mengenai resolusi pada akhir multaqa hari ini, Dr Abdul Hamid berkata secara umumnya ia menyentuh dua perkara asas iaitu politik Islam dan pelan tindakan yang perlu dilaksanakan bagi meningkatkan kekuatan ummah.

Antara lain persidangan itu merumuskan bahawa ajaran Islam tidak disampaikan kepada orang Islam secara menyeluruh.

"Keadaan itu dirancang oleh pihak tertentu, oleh orang yang tidak mahu umat Islam maju dengan memasukkan unsur-unsur yang melemahkan ummah.

"Contohnya azan diajar hanya sebagai tanda masuk waktu sembahyang. Tetapi dalam azan ada unsur yang menyeru umat Islam untuk mencapai kejayaan yang tidak diajar kepada ummah," katanya.

Beliau berkata agama Islam bukan menolak kemajuan kerana Islam juga menuntut pembangunan duniawi.

-- BERNAMA

APG MAM LAT